



Հովհաննես Շիրազ

Մասիսն ի վեր

Երբ օրոցում աչքս բացի՝ Մասիս սարերն հեռվում տեսա,
Գերված տեսա ու ես լացի, Հայոց ցավերն հեռվում տեսա,
Ա՛խ, ես մանկուց երագեցի սուրալ ազատ Մասիսն ի վե՛ր,
Հովտում այրվող սիրտս բացի, բայց հով սարե՛րն հեռվում տեսա:

Ա՛խ, ասացին ճամփա չրկա քարերն ի վեր, ի վեր Մասիս,
Կրնկնի վիհերն ով բարձրանա սարերն ի վեր, ի վեր Մասիս,
Մենակ դու չես սիրտ իմ կարոտ, աչքդ հատել Մասիսն ի վեր,
Ժողովուրդս է ձգտել հավերժ դարերն ի վեր, ի վեր Մասիս:

Միթե՞ իրավ անհաս ես դու, ա՛խ, իմ երագ Մասիսն ի վեր,
Միթե՞ մի օր չեմ հասնելու աստեղնահաս Մասիսն ի վեր,
Նախահայրս է սանդուխք դրել աստղերն ի վե՛ր, ի վեր Մասիս,
Ա՛խ, միթե՞ չեմ համբուրվելու իմ աստղի հետ Մասիսն ի վեր:

Մ՛խ, չէ՛, նա է հույսիս ճամփան՝ քարերն ի վե՛ր, ի վեր Մասիս,
Թո՛ղ ամպ ու շանթ գլխիս ոռնան սարերն ի վեր, ի վեր Մասիս,
Կրտանեմ սիրտս վիրավոր որպես դրոշ Մասիսն ի վեր,
Թէկուզ մահով կը բարձրանամ դարե՛րն ի վեր, ի վեր Մասիս: